

14/08/1997

Sistem cukai dikaji semula

KUALA LUMPUR, Rabu - Kajian semula sistem percukaian negara adalah antara beberapa langkah kerajaan bagi mengehadkan kegiatan spekulasi kewangan, kata Datuk Seri Dr Mahathir Mohamad.

Sambil menyifatkan kejatuhan pasaran sekarang bersifat sementara, Perdana Menteri mahu langkah pencegahan jangka panjang dilaksanakan bagi mengelakkan keadaan yang sama berulang.

Beberapa negara Eropah kini turut mengkaji kemungkinan menggunakan sistem percukaian bagi mengehadkan kegiatan spekulasi.

"Kita boleh (melaksanakan pelbagai langkah kecemasan) tetapi ia lebih bersifat sementara. Apa yang diperlukan ialah penyelesaian jangka panjang ke arah mengatasi kegiatan terbabit.

"Ada negara Eropah yang sedang memikirkan kemungkinan mengehadkan (kegiatan) spekulasi menerusi percukaian. Saya tidak tahu sama ada ia boleh dilakukan tetapi kita sedang mengkaji," katanya tanpa menjelaskan bentuk kajian itu.

Bercakap kepada pemberita selepas mengunjungi Pengerusi Bersama Majlis Menteri-menteri Bosnia-Herzegovina, Dr Haris Silajdzic dan Boro Botic yang berlepas pulang, petang ini, Dr Mahathir yakin ekonomi negara akan pulih semula kerana asas pembangunan utama masih kukuh.

"Asas fundamental negara amat kukuh ... syarikat masih membuat keuntungan, industri asas terus bergerak lancar, jadi apa yang dialami ketika ini akan berlalu tanpa memberi kesan," katanya.

Beliau bagaimanapun kecewa dengan kegiatan spekulasi oleh individu tertentu di negara yang menurutnya didalangi oleh negara kaya yang tidak berniat menolong negara miskin.

"Negara (kaya) ini langsung tidak membantu orang miskin, tetapi apabila mereka lihat ada negara miskin yang meningkat maju, mereka akan cuba menjatuhkannya," kata Dr Mahathir.

Selepas jatuh teruk minggu lalu, harga saham di Bursa Saham Kuala Lumpur hari ini mengalami pemulihan dan ditutup lebih tinggi walaupun sedikit kegiatan mengambil untung mengurangkan sebahagian daripada kenaikan terdahulu.

Pengukur pasaran Indeks Komposit mencapai tahap tertinggi pada 919.58 pagi tadi sebelum susut kemudiannya untuk ditutup pada 908.83, tetapi 11.58 mata lebih tinggi daripada penutupan semalam.

Indeks Emas meningkat 2.47 mata kepada 261.68, Indeks Perusahaan naik 33.69 mata kepada 1,851.84 dan Indeks Papan Kedua menokok 4.48 mata kepada 485.56.

Perdana Menteri juga menjelaskan, kerajaan bukan menanggungkan projek-projek nasional sebaliknya mengurangkan import bagi mengurangkan kesan kejatuhan nilai ringgit sekarang.

"Bukan menanggung, cuma kita nak kurangkan import. Sekarang ini kos import lebih tinggi kerana nilai ringgit jatuh. Oleh itu, buat sementara waktu kita terpaksa mengurangkan import," ujarnya sambil menjelaskan langkah itu hanyalah sementara.

Beberapa akhbar hari ini memetik Timbalan Perdana Menteri, Datuk Seri Anwar Ibrahim sebagai berkata, kerajaan mungkin menimbangkan langkah menanggungkan projek nasional yang dianggap tidak kritikal dan import barangan bagi mengurangkan kesan kelemahan ringgit berbanding unit dolar AS.

Menurut Dr Mahathir, kerajaan akan meneruskan projek-projek nasional

kerana ia bukanlah projek mega seperti anggapan sesetengah pihak.

"Sebenarnya ia bukanlah projek mega.

Sektor swasta membina hampir semua bandar di Malaysia, mereka tidak membina satu atau dua buah rumah.

Mereka membina bandar yang lengkap termasuk dengan sekolah dan masjid.

"Ada projek berharga lebih RM4 bilion dilakukan oleh hanya seorang individu.

Oleh itu, apakah ini projek mega sedangkan ia dibina oleh sektor swasta.

Kita (kerajaan) tidak membelanjakan wang apabila ia dilakukan oleh swasta. Begitupun kita perlu kurangkan import," ujarnya.

(END)